

孟孔孔

子子子

弟弟門

子子人

考考考





孔子門人考

朱彝尊撰

叢書集成初編

(補印本)

孔子門人及其其他二種

一九三九年十二月初版

一九六〇年一月補印

朱 彝 尊 撰

商 務 印 書 館 出 版

上 海 市 印 刷 六 廠 印 刷

孔子門人考

清 秀水朱彝尊錫鬯撰

成回。

劉向曰。成回學于子路。

楚馯臂子弓。或作宏。

司馬遷曰。孔子傳易于商瞿。瞿傳楚人馯臂子宏。

應邵曰。子弓。是子夏門人。

韓子曰。荀卿之書。語聖人必曰孔子子弓。子弓之事業不傳。惟太史公書。弟子傳。有姓名曰馯臂子弓。吳萊曰。荀卿所重仲尼子弓。子弓未審何人。韓子曰。仲尼弟子有馯臂子弓。漢儒林傳。商瞿授易仲尼。瞿傳魯橋疵子庸。子庸傳江東馯臂子弓。子弓與仲尼不同時。又行事無大卓卓。不足以配孔子。邢昺論語疏。引王弼說。逸民朱張。字子弓。然弼說又不見有他據也。要之孔子嘗稱冉雍可使南面。且在德行之科。雍字仲弓。蓋與子弓同是一人。如季路又稱子路然也。將荀卿之學。實出于子弓之門人。故尊其師之所自出。與聖人同列。

按子庸傳易于子弓。弓或作宏。吳氏欲更作雍。未免失之鑿矣。

魯橋庇子庸。

班固曰。商瞿受易孔子。以授魯橋庇子庸。

司馬貞曰。橋庇。世本作橋疵。字子肩魯莊公族。

按子木傳易。史記謂子宏授子庸。漢書漢紀。釋文。謂子庸授子弓。所載互異。今並存之。

魏文侯都。

司馬遷曰。文侯受子夏經藝。

徐廣曰。名都。世本曰斯也。

鮑彪曰。桓子之孫。

吳師道曰。名勤。

按文侯受經藝于子夏。撰有孝經傳。蔡邕明堂論。引其文曰。大學者。中學明堂之位也。又賈思勰齊民要術耕田篇。引其文曰。民春以力耕。夏以鋤耘。秋以收斂。當是孝經用天之道。分地之利注也。

晉段干木。

呂不韋曰。段干木。晉國之大馭也。學于子夏。爲天下名士。顯人以終其壽。

羅泌曰。段干氏。初邑段。後邑干。因邑爲氏。魏世家有段干子。田世家有段干朋。而風俗通氏姓注。乃以爲姓段名干木。蓋以呂氏春秋干木光于德。與魏都賦干木之德之言誤之。唐百官表。遂謂封段而爲

干木大夫疏矣。幽通賦云：木偃息以藩魏，干木豈其名哉。

田無擇子方。

李頤曰：魏文侯師也，名無擇。

韓子曰：子夏之學，其後有田子方。子方之後，流而爲莊周。故周之書喜稱子方之爲人。

齊高行子。

趙岐曰：高子，齊人。

徐整曰：子夏授詩于高行子。

王應麟曰：高行子，卽詩序及孟子所謂高子也。

曾申子西。

劉向曰：左邱明授春秋于曾申。

趙岐曰：曾西，曾子之孫。

陸德明曰：曾參之子，受詩于子夏。

王應麟曰：曾西，趙岐注以爲曾子之孫。集注因之。經典序錄：曾申，字子西。曾參之子。子夏以詩傳曾申。

左邱明作傳以授曾申。曾西之學于此可攷。楚鬪宜申、公子申，皆字子西。則曾西之爲曾申無疑。

按史記吳起事曾子，其母死不歸。曾子薄之，而與起絕。所云曾子疑是曾申。

齊公羊高、宋贈臨淄伯。

戴宏論春秋曰：子夏傳與公羊高。

荀崧曰：公羊親受子夏。

梁武帝曰：公羊稟西河之學。

孔穎達曰：孔子授春秋于卜商，商授弟子公羊高、穀梁赤，各爲之傳。

吳兢曰：公羊高、乃子夏弟子。

魯穀梁赤、宋贈龔邱伯，改贈睢陽伯。

應邵曰：穀梁子名赤，子夏弟子。

楊士勳曰：穀梁子名俶，字元始。

顏師古曰：穀梁子名喜，受經于子夏。

按羅長源撰路史，炎帝之後，不言有公羊穀梁氏。羅子蒼識遺云：公羊穀梁，自高赤作傳外，更不見有此姓。萬見春謂皆姜字切韻腳，疑爲姜姓假託。然自高傳子平，平傳子地，地傳子敢，敢傳子壽，見于戴宏所記，而班氏古今人表，載有二子居第四等，計劉氏、宋氏，世本亦必載之，未必假託也。

又按春秋爲孔子所作，則說春秋者，必係孔氏門人。若公羊傳所稱沈子、司馬子、女子、北宮子、曾子、高子、穀梁傳所稱尸子、沈子，皆是已子言之春秋屬商，其皆子夏之徒與。

魯孔伋子思。宋崇甯初。贈沂水侯。咸淳中。加贈沂國公。

孔鮒曰。子思受業于曾子。

韓子曰。子思之學。蓋出曾子。

按班氏古今人表。子思居第二等。

樂正子春。

鄭康成曰。曾子弟子。

魯檀弓。

陸德明曰。檀弓。魯人善于禮。

胡寅曰。檀弓。曾子門人纂修論語。

沈猶行。

趙岐曰。曾子弟子。

按廣韻注。沈。直深切。漢複姓。魯有沈尤氏。常朝飲其羊。不當從上聲讀。

陽膚。

包咸曰。陽膚。曾子弟子。

公明高。

趙岐曰公明高曾子弟子。

公明宣。

劉向曰公明宣學于曾子。

單居離。

大戴禮記注曰單居離曾子弟子。

公明儀。

孔穎達曰子張之喪公明儀爲志焉公明儀是其弟子儀又爲曾子弟子故祭義云公明儀問于曾子

曰夫子可以爲孝乎是也。

子襄。

趙岐曰曾子弟子。

公孫尼子。

按漢書藝文志儒家有公孫尼子二十八篇雜家有公孫尼一篇顏師古注云七十子之弟子隋經籍志唐藝文志均載公孫尼子一卷注云似孔子弟子沈約謂樂記取公孫尼子劉勰謂緇衣公孫尼子所作今從顏氏定爲孔子門人。

按漢志世子二十一篇。列在儒家者流。王充論衡本性篇。周人世頌。以爲人性有善有惡。在所養焉。故作養書一篇。宓子賤。漆雕開。公孫尼子之徒。亦論性情與世子相出入。志所載宓子十六篇。漆雕子十三篇。皆宗師仲尼以重其言者也。顏師古曰。世子。陳人七十子之弟子。

景子。

按漢藝文志。景子三篇。顏師古云。說宓子語。似其弟子。

王史氏。

漢志王史氏二十一篇。

劉向曰。六國時人。

顏師古曰。七十子後學者。

李克。

漢藝文志。李克七篇。

顏師古曰。子夏弟子。爲魏文侯相。

半嬰。

漢志十八篇。

顏師古曰。齊人。七十子之後。

公孫段

韓非曰。孔子之後。儒分爲八。有子張氏。子思氏。顏氏。孟氏。漆雕氏。仲良氏。公孫氏。樂正氏之儒。

陶潛曰。顏氏傳詩爲道。爲諷諫之儒。孟氏傳書爲道。爲疏道致遠之儒。漆雕氏傳禮爲道。爲恭儉莊敬之儒。仲良氏傳樂爲道。以和陰陽爲移風易俗之儒。樂正氏傳春秋爲道。爲屬辭比事之儒。公孫氏傳易爲道。爲潔靜精微之儒。

按儒分爲八。其一公孫氏傳易者也。羣輔錄有明徵。而未詳其名。攷晉書太康二年。汲郡人不準發魏冢。得竹書易五篇。公孫段與邵陟論易二篇。此則公孫氏之易矣。或疑公孫氏爲龍。龍字子石。雖在七十子之列。不聞傳易。若趙人名龍者。字子乘。故莊子謂惠子曰。儒墨楊乘。四與夫子爲五。果孰是邪。所云乘者龍也。詭辭數萬。騁堅白異同之辯。初非孔氏弟子。小司馬史記索隱。誤認爲一人。今考定傳易者爲公孫段。若鄭大夫字伯石者。又一人也。

縣。廩父。廩。乘。隱作豐。家語無父字。依廣韻注添。子象。

王應麟曰。縣豐。唐宋封爵皆不及。禮記檀弓。有縣子。豈其人與。

按子象。爲孔子門人。見廣韻注。此唐宋封爵未之及云。

公休哀。

公祈哀。

廣韻注孔子門人有公休哀公祈哀。

按公祈哀疑卽公皙哀以皙作祈形相類而譌也。然廣韻注既列孔子弟子公皙哀于前。又列孔子門人公祈哀于後。則別是一人。未可臆決也。


益成括。

按晏子春秋景公宿于路寢之宮。夜分聞西方有男子哭者。公悲之。明日朝問于晏子。晏子對曰。西郭徙居布衣之士益成括也。父之孝子。兄之順弟也。又嘗爲孔子門人。今其母不幸而死。耐柩未葬。家貧身老。子孺恐力不能合耐。是以悲也。公曰。子爲寡人弔之。嬰往弔。咎公不辱臨。公使男子袒免。女子髮笄。開凶門而迎。適則適。乃與景公同時。不當與孟子弟子之列。宋配祀孟子。追贈萊陽伯。孫宣公言括嘗欲學于孟子。亦疑辭也。

歐陽子有言。受業者爲弟子。受業于弟子者爲門人。試稽之論語。所云門人。皆受業于弟子者也。顏淵死。門人厚葬之。此顏子之弟子也。子出。門人問。此曾子之弟子也。子疾病。子路使門人爲臣。又門人不敬子路。此子路之弟子也。子夏之門人。問交于子張。此子夏之弟子也。孟子云。門人治任將歸。入揖于子貢。此子貢之弟子也。觀洪氏隸釋。隸續。所載東漢諸碑。有弟子復有門生。門人弟子。固有別矣。若夫弟子之子。分比于門人。子淵子輿。本門人也。而列于弟子。他如季路之子子崔。子輿之子元及華。子游之子言思。子張之子申詳。又齊有芊嬰。著芊子十八篇。亦七十子之後。雖未詳其所師。要當互學于七

十子者也。

又按孔子門人古今人表居第三等者樂正子春、段干木、田子方、第四等者公羊子、穀梁子、公明高、第五等者陽膚、第六等者檀弓、而子張之子申詳亦置第三等。



孔子弟子考

朱彝尊撰

孔子弟子考

本館據學海類編
本排印初編各叢
書僅有此本

序

孔氏之徒三千人。身通六藝者七十子。其云三千。不取盈于三千也。其云七十。不限止以七十也。自孔子徒人法既亡。而文翁石室象在顯晦之間。世儒據以考定弟子之籍。惟史記之傳家語之解而已。議配祀之典。先橫七十之目於心胸。慮溢七十二人之外。于是論者紛綸。以臆斷爲進退。舉凡論語春秋傳禮記。漫不知省。或又于複姓者改姓一字。書之栗主。自國學下至府州縣學。皆然是。尙得爲知禮也乎。歸田之暇。爰作孔子弟子考。下及門人暨孟子弟子。竊思杏壇設教。必先長幼之序。斯史記家語咸紀弟子之年。茲先書三十三人。而萊蕪侯無年歲。次于衛公者。依侍坐四子倫序書之。不可以郈公先之也。餘從羣書采獲具列焉。小長蘆朱彝尊書。

孔子弟子考

清 秀水朱彝尊錫鬯撰

魯秦子商字不茲。家語作不慈。史記作子丕。少孔子四歲。唐開元二十七年追贈上洛伯。宋大觀四年贈

馮翊侯。

按高郵夏氏孔門弟子記略及闕里廣志皆云商少孔子四十歲。然秦子父堇父。偃陽之役與叔梁紇俱以力聞。宜與孔子生年相近。今據家語舊聞暨史記索隱。蘇氏古史文正之。又宋大中祥符元年贈孔門弟子侯爵。商未得與。至大觀四年禮局上言。遂補贈馮翊侯。闕里志誤以秦祖鄆城之封移之商。非也。

魯顏子無繇。家語少無字。繇作由。字季路。少孔子六歲。唐追贈杞伯。宋贈曲阜侯。元進杞國公。諡文裕。

蒲大夫卞仲子由字子路。子亦作季。少孔子九歲。唐追贈衛侯。宋贈河內侯。追衛公。

魯南武曾子蒧。亦作點。字子皙。唐追贈宿伯。宋追贈萊蕪侯。

蔡漆雕子開字子若。史記作子開。少孔子十一歲。習尚書。唐追贈藤伯。宋平輿侯。

漢藝文志漆雕子十二篇。

鄭康成曰魯人。

按龜山楊氏先聖大訓以開爲憑恐誤。

魯閔子損字子騫少孔子十五歲唐追贈費侯宋贈琅琊公改費公。

按閔子少孔子十五歲史記家語文同小司馬索隱可證今本家語多譌作五十歲夏氏從之非也。

魯冉子雍字仲弓少孔子二十九歲唐追贈薛侯宋贈下邳公改薛公。

按今本家語仲弓無年歲而史記索隱文有之。

魯冉子求字子有家語仲弓之宗族少孔子二十九歲唐追贈徐侯宋贈彭城公改徐公。

魯商子瞿字子木少孔子二十九歲唐贈蒙伯宋贈須昌侯。

齊梁子鱸或作鯉字叔魚少孔子二十九歲家語作三十九歲唐贈趙伯宋贈千乘伯。

魯顏子回字子淵少孔子三十歲唐追贈竟國公宋因之元至順中贈復聖公。

衛士師齊高子柴字子羔左傳作季羔檀弓韓非子作子皋少孔子三十歲家語作四十唐贈共伯宋贈共城侯。

鄭康成曰衛人。

王應麟曰衛高柴爲孔子弟子後居于魯。

單父宰陳巫馬子施字子期史記作旗少孔子三十歲唐贈鄭伯宋贈東阿侯。

鄭康成曰魯人。

魯衛相衛端木子賜字子貢少孔子三十一歲唐贈黎侯宋贈黎陽公進黎公魯有子若字子有或作子若少孔子三十三歲唐贈卞伯宋贈平陰侯

按小司馬據家語文云少三十三歲今本家語作三十六歲殆誤也

武城宰吳言子偃字子游少孔子三十五歲史記作四十五唐贈吳侯宋贈丹陽公改吳公許慎說文偃作於象旌旗之游字子游

魯樊子遲字子遲少孔子三十六歲家語作四十六唐贈凡伯宋贈益都侯

鄭康成曰齊人

宋原子憲檀弓稱仲憲字子思少孔子三十六歲唐贈原伯宋贈任城侯

鄭康成曰齊人

魯大夫武城澹臺子滅明字子羽少孔子三十九歲唐贈江伯宋贈金鄉侯

單父宰魯宓子不齊字子賤少孔子三十九歲唐贈單伯宋贈單父侯

按史記索隱引家語云少孔子四十九歲而今本家語無九字索隱又引史記文三十而今本史記作四十流傳既久均失其故矣

陳陳子亢說文作伉字子禽少孔子四十歲唐贈潁伯宋贈南頓侯

按班固古今人表其載孔門弟子甚略獨陳子三見一陳亢一陳子禽居中一陳子亢居中下不得

其解。

魯公西子赤、字子華。少孔子四十二歲。唐贈郟伯。宋贈鉅野侯。

莒父宰衛卜子商、字子夏。少孔子四十四歲。晚爲衛文侯師。唐贈衛侯。宋贈東阿公。或作河東公。改魏公。

鄭康成曰：溫國人。

南武城曾子參、字子輿。少孔子四十六歲。初仕于莒。其後齊迎以相。楚迎以令尹。晉迎以上卿。唐開元中。

追贈郟伯。宋大中祥符二年進郟侯。政和元年改贈武城侯。咸淳三年進郟國公。元至順中贈宗聖公。

漢藝文志：曾子十八篇。

王應麟曰：參與弟子公明儀、樂正子春、單居離、曾元、曾華之徒。論述立身孝行之要、天地萬物之理。

魯顏子幸。通典作柳。咸淳臨安志作章。或作辛。字子柳。少孔子四十六歲。追贈蕃伯。宋贈陽穀侯。

陳顥孫子師、字子張。少孔子四十八歲。唐贈陳伯。宋贈宛邱侯。改陳公。

魯冉子孺、字子魯。或作曾。少孔子五十歲。唐贈紀伯。宋贈臨沂侯。

蔡曹子卣、字子循。少孔子五十歲。唐贈曹伯。宋贈上蔡侯。

魯伯子虔。家語作處。字子析。家語作皙。少孔子五十歲。唐贈聊伯。宋贈沐陽侯。

按伯虔、史記家語不著何地人。考咸淳臨安志云：是魯人。宋思陵贊曰：有虔子析。全魯之彥。當必有

所本也。聊伯志作駢伯。

魯顏子高。史記索隱云：家語名產。今本家語作顏刻。字子驕。少孔子五十歲。唐贈琅琊伯。宋贈雷澤侯。
魯叔仲子會。字子期。少孔子五十歲。魯峻石壁畫像云：唐贈瑕丘伯。宋贈博平侯。

鄭康成曰：晉人。

楚公孫子龍。字子石。少孔子五十三歲。唐贈黃伯。宋贈枝江侯。

按家語稱龍衛人。然唐宋追封皆楚地。蓋從北海鄭氏之說。若爲堅白異同之論者。乃趙人樂正子輿。謂其行無師。學無友。非孔子弟子可知。

右有年歲著于家語。史記隸續者三十有一人。并曾歲共三十二人。內顏淵年數。王肅疑其錯誤。
中都宰魯冉子耕。字伯牛。唐贈鄆侯。宋贈東平侯。改鄆公。

按聖門志。闕里廣志。稱伯牛。少孔子七歲。不審何據。

臨淄大夫魯宰子子。字子我。唐贈齊侯。宋贈臨淄公。改齊公。

魯史記作齊。公冶子長。家語作襄。字子長。唐贈莒伯。宋贈高密侯。范甯曰：名芝。字子長。

魯南宮子綽。或作韜。一名括。或作适。字子容。唐贈郟伯。宋贈襲邱侯。改汝陽侯。

夏洪基曰：南宮适之爲敬叔。非也。按史記。南宮括。字子容。初未嘗云是孟僖子之子。孟懿子之兄也。而索隱注。遽云是孟僖子之子。仲孫閱。論語集注。亦云諡敬叔。孟懿子之兄。史無其文也。可疑一也。适見家語一名綽。是适已有二名矣。而左傳孟僖子云：必屬說與何忌于夫子。索隱又云：仲孫閱。是又二名。

天下豈有一人而四名者乎。可疑二也。孔子在魯，族叔頗微，而南公敬叔公族元子，遣從孔子時，定已娶于強家矣。豈孔子得以兄子妻之，可疑三也。禮記檀弓載南宮敬叔反，必載寶而朝。孔子曰：喪不如速貧之爲愈也。若而人，豈能抑權力而伸有德，謹言語而不廢于有道之邦邪？愚以敬叔之與南宮适，皎然二人矣。

按史記南宮括字子容，論語括作适。家語南宮縉字子容，鄭康成注檀弓稱南宮縉，孟僖子之子南宮閱也。字子容，其妻孔子兄女。又稱南宮敬叔，魯孟僖子之子仲孫閱也。左氏傳昭公七年，孟僖子屬說與何忌于夫子使事之。杜預注云：說南宮敬叔，僖子之子，然則括也。适也。縉也。說也。閱也。一子容而名有五也。崇禎末，高郵夏洪基元開輯孔門弟子傳略，以南宮縉适括，字子容爲一人，以仲孫說閱諡敬叔者爲一人。至于說苑所載南宮邊子，謂是适字之譌。然漢書古今人表，既有南容，又有南宮敬叔，又有南宮邊子。顏師古注于南容，則云南宮縉也。于敬叔，則名南宮适也。是縉與适，适與邊子，均未可混而爲一矣。

齊公皙子哀，家語作克，字季次，或作沈。唐贈鄖伯，宋贈北海侯。

顧炎武曰：汶上縣有漢衛尉卿衡方碑，其文曰：履該顏原，兼修季由。洪适以顏原爲顏淵，原憲而都穆以季由卽季路，與兼修義不協。按公皙哀，字季次，不爲家臣。太史公與原憲並稱一稱字，一稱名，亦古文所嘗有也。

陳公良子孺，字子正。唐贈東牟伯。宋贈牟平侯。

宋司馬子耕，家語耕上有黎字。字子牛。唐贈向，或作滕伯。宋贈楚邱侯。改睢陽侯。

衛琴子牛，字子開。一字子張。唐贈南陵伯。宋贈頓邱侯。改贈陽平侯。

家語有史記無。

秦秦子祖，字子南。唐贈少梁伯。咸淳臨安志作沙梁。宋贈郵城侯。

衛奚容子蒧，字子哲。一云字子楷。唐贈下邳伯。宋贈濟陽侯。

魯公祖子句茲，字子之。唐贈期思伯。宋贈卽墨侯。

衛廉子潔，字子庸。唐贈莒父伯。宋大觀中補贈胙城侯。

齊公西子輿如，字子上。唐贈重邱伯。宋贈臨朐侯。

宰或作罕。父子黑，字子素。唐贈乘邱伯。宋大觀中補贈祈鄉侯。

魯公西子蒧，字子尚。唐贈祝阿伯。宋贈徐城侯。

秦壤駟子赤，字子徒。或作從。唐贈北衛伯。宋贈上邽侯。

魯冉子季，字子產。唐贈東平伯。宋贈諸城侯。

薛子邦，字子從。

鄭子國，字子徒。唐贈滎陽伯。宋贈胸山侯。

司馬貞曰家語薛邦字從史記作國而家語稱邦者蓋避漢祖諱而改鄭與薛字譌也

按仲尼之徒名字閒有同者既有魯蒧亦有奚容蒧又有公西蒧既有冉耕亦有司馬耕既有宓不齊又有仕不齊既有公西赤亦有壤駟赤既有卜商亦有秦商既有原亢亦有陳亢既有狄黑亦有宰父黑既有冉孺亦有公良孺既有秦祖亦有顏祖此名不嫌同也冉求字子有若漆雕徒父亦字子有顏無繇字季路仲由亦字季路顓孫師字子張琴牢亦字子張巫馬施字子期叔仲會亦字子期公西蒧字子上公西輿如亦字子上秦非字子之公祖句茲亦字子之原憲字子思孔伋亦字子思曾蒧字子皙伯虔狄黑奚容蒧亦字子皙壤駟赤字子徒鄭國亦字子徒秦冉字子開琴牢亦字子開申續字子周公伯繚亦字子周榮旂字子祺縣成亦字子祺顏增字子聲樂欬亦字子聲漆雕哆字子斂邾巽亦字子斂此字不嫌同也然則薛邦鄭國子徒子從安見其名字相類而并疑其姓氏之誤邪乃議祀典者封鄭而罷薛安見其必爲一人揆之于禮終有未安也

齊后今本家語誤石子處字子里唐贈營邱伯宋大觀中補贈膠東侯

魯□人子郢字子行唐贈臨淄伯宋贈南華侯

衛狄子黑字子皙家語作皙之唐贈臨濟伯宋贈林慮侯

魯商子澤字子秀唐贈睢陽伯宋贈鄒平侯

楚任子不齊字子選唐贈城伯宋贈當陽侯

魯榮子旂。家語作祈。字子祺。家語作子顏。唐贈雩安伯。宋贈厭次侯。

魯顏子噲。字子聲。唐贈朱虛伯。宋贈濟陰侯。

原子亢。家語作伉。或作桃。字子藉。唐贈萊蕪伯。宋贈樂平侯。

晉或作魯公肩子定。字子中。唐贈新田伯。宋大觀中補贈梁父侯。

魯秦子非。字子之。唐贈汧陽伯。宋贈華亭侯。

漆雕子徒父。家語作從。字子文。或云字子友。唐贈須句伯。宋贈高苑侯。

燕子伋。或作級。字子思。唐贈漁陽伯。宋贈汧源侯。

魯公夏子守。字子乘。宋大觀中補贈鉅平侯。

按魏志有公夏浩。或子乘之後。

衛句子井疆。字子疆。唐贈淇陽伯。宋贈滄陽侯。

齊少叔子乘。字子車。唐贈淳于伯。宋贈博昌侯。

按應邵風俗通云。凡氏于字。伯仲叔季是也。氏有太叔仲叔。則有少叔。無足異者。子車之姓。家語史記

諸書皆作步。而廣韻注云。孔子弟子有少叔乘。係複姓。今從之。

石作子蜀。字子明。唐贈石邑伯。宋贈成紀侯。

魯邾子巽。史記索隱作邾巽。文翁石室圖作國選。家語巽亦作選。字子斂。唐贈平陸伯。宋贈高堂侯。

魯施子之常。字子恆。唐贈乘氏伯。宋贈臨濮侯。

魯申子績。字子周。家語今本作績。

申子棠。字周。史記今本作黨。禮殿圖作儻。唐贈邵陵伯。宋贈淄川侯。

申子根。論語。字子績。咸淳臨安志。唐贈魯伯。臨安志作阿伯。宋贈文登侯。

陸德明曰。申根。鄭康成云。蓋孔子弟子申績。史記云。申棠字周。家語云。申績字周也。

司馬貞曰。文翁圖所記。有申根申棠。

王應麟曰。史記。申棠字周。家語。申績字周。今史記以棠爲黨。家語以績爲績。傳寫之誤也。後漢王政碑云。有羔羊之潔。無申棠之欲。亦以根爲棠。則申棠申根一人耳。唐開元封申黨召陵伯。又封申根魯伯。本朝祥符封根文登侯。又封黨淄川侯。俱列從祀。黨卽棠也。一人而爲二人。失于詳考。陸氏釋文也。史記索隱。謂文翁圖有申棠申根。今所傳禮殿圖。有申黨。無申根。

按七十子。顏氏居其八。冉氏居其五。秦氏居其四。公西氏漆雕氏居其三。商氏縣氏原氏居其二。若申根申棠。文翁圖記竝列。開元祥符亦竝追封。鄭康成陸德明疑爲一人。則以績黨竝字周也。夫黨黨字義相近。合之可耳。而高郵夏洪基。強以棠根爲諧聲字。亦近鑿。且如公西蒧公西輿。如同字子上。未嘗不竝祀。何獨績與黨同字。必當去其一乎。竊謂唐宋議禮諸儒。未爲不是。有其舉之。莫或廢也。記有之矣。

魯樂子欬或作欣字子聲唐贈昌平伯宋大觀中補贈建成侯

按春秋定公十二年費宰公山不狃率費人以襲魯孔子命申須句樂頎動士衆下伐之費人北遂墜三都之城杜預注以二人爲魯大夫考樂欬家語作樂欣欣與頎偏旁相同疑頎卽是欣且文云孔子命之其爲弟子未可知也

魯顏子之僕字子叔唐贈東武伯宋贈寃句侯

魯孔子忠或作弗字子蔑孔子兄孟皮子唐贈汝陽伯宋贈鄆城侯

魯漆雕子哆字子斂唐贈武城伯宋贈濮陽侯

魯縣子成字子祺今家語作子橫唐贈鉅野伯宋贈武城侯

魯顏子相史記作祖字子襄唐贈臨邑伯宋大觀中補贈富陽侯

司馬貞曰家語無此人

按孟子昔者曾子謂子襄曰或是語顏子亦未可定

魯公伯子寮論語作寮史記索隱作寮今本作僚又作遼或云卽申繆字子周唐贈任伯宋贈壽張侯

馬融曰寮魯人弟子也

按公伯寮見史記弟子傳又見文翁禮殿圖必非無稽之言後儒以愬子路一事斷爲非聖人之徒然論語聖門六十人所記公是公非有過未嘗少隱卽宰我冉有陳亢過皆不免似未可以一眚而盡掩

其生平也。子長引孔子之言。受業身通者七十有七人。皆異能之士。寮蓋其一矣。而致堂胡氏因家語不列其名氏。謂史記失之。迨明程敏政乃建議。謂是聖門之誣。請罷其祀。嘉靖中。行人司正薛侃復謂公伯寮及秦冉顏何。皆不見于家語。而傅會于史記。請均去之。愚謂家語。史記。周公禮殿圖。傳聞異辭。則有之。若專信家語。以史記爲傅會。未免失之偏矣。

鄒子單。字子家。唐贈銅鞮伯。宋大觀中。補贈聊城侯。

史記禮殿圖有家語無。

秦子冉。字子開。唐贈彭衙伯。宋贈新息侯。

史記禮殿圖有家語無。

魯顏子何。字子冉。唐贈開陽伯。宋贈堂邑侯。

史記有家語無。

按秦冉顏何二子。于宏治元年少簪事程敏政。請正祀典。疑爲字畫相近之誤。而罷其配食。自詡不舛于禮。一洗前代相習之陋。永爲百世可遵之典。然生數千載之後。安見二子必無其人。釋曇積上言于周太祖曰。孔子領徒三千。達者七十有二。升堂入室者莫過數人。自餘已外。豈容斥逐。彼釋氏之言。尙然。乃以臆見斥先賢之祀。天資刻薄之言。吾未信爲百世可遵也。

廉子瑀。

禮殿圖有家語史記無。

魯孺子悲。

按小戴禮雜記恤由之喪。哀公使孺悲之孔子學士喪禮。士喪禮于是乎書。鄭康成注云。士之喪禮已廢矣。孔子以教孺悲。國人乃復書而存之。方慤注云。喪禮將亡。聖人不可以不書。必待孺悲學之。然後孔子書之者。以明禮之不廢。亦有所因也。蓋孔門自子夏兼通六藝而外。若子木之受易。子開之習書。子輿之述孝經。子貢之問樂。有若仲弓。閔子騫。言游之撰論語。而傳士喪禮者。實孺悲之功也。惟因論語紀悲欲見而孔子以疾辭。疑孔子拒之門牆之外。不屑教誨。當知始雖辭疾。終授以禮。以親受禮于孔子之儒。反不得與配食之列。斯則祀典之闕矣。

公罔子之裘。

序子點。

按二子從射。鬻相之圃。孔子使揚觶而語。見禮記射義。射既闕。子路進曰。由與二三子者之爲司馬何如。孔子曰。能用命矣。則家語載之。記首言孔子與門人習射于鬻相之圃。子路之云曰。二三子。是二子爲孔子弟子無疑也。

仲孫子何忌。僖子纓之子也。卒諡懿子。

按春秋左氏傳。孟僖子將死。召其大夫曰。孔邱。聖人之徒也。臧孫紇有言曰。聖人有明德者。若不當世。

其後必有達人。今其將在孔邱乎。我若獲後，必屬說與何忌于孔子，使事之而學禮焉。故孟懿子與南宮敬叔師事仲尼。據此緣，僖子病不相禮，故曰禮人之幹也。無禮無以立，乃屬二子事孔子學禮焉。懿子問孝，對曰無違。蓋語以無違，僖子學禮之命。樊遲不知，子告之以生事之以禮，死葬之以禮，祭之以禮。舍禮無以教懿子也。孔叢子又載懿子問書，欽四鄰之義，不可不附弟子之列云。

仲孫子說亦作閱。孟僖子之子懿子之弟居南宮，又曰南宮敬叔。

按世本仲生纓生南宮縉。孔安國以南宮适卽敬叔。魯大夫鄭康成注禮云：敬叔，魯孟僖子之子仲孫閱是也。又云南宮縉，孟僖子之子南宮閱也。字子容，其妻孔子兄女。陸德明釋文云：南宮閱，一名縉。司馬貞史記索隱亦云南宮括。家語作南宮縉。按其人是魯孟僖子之子仲孫閱也。近高郵夏洪基辨南宮适括縉字子容是一人。仲孫閱說字敬叔是一人。攷春秋名號歸一圖，仲孫即閱，南宮敬叔，僖子之子。孔子弟子也。而不及括縉，則夏說似屬可從者。孔子將適周，敬叔言于昭公，資車一乘，馬二匹，與敬叔俱至周。問禮于老聃，問樂于萇宏，歷郊射之所，考明堂之制，察廟朝之度，自周反魯，弟子稍益進焉。子曰：自南宮敬叔之乘我車也，而道加行，是敬叔在弟子之列，有功於聖門者矣。今祀典配适而無閱，不無可議焉。

孔子璇

按嘉靖中，張孚敬改定祀典，以秦冉顏何疑爲字畫之誤，而罷其祀。又以薛邦疑卽鄭國，遂亦罷祀而

并黜孔璇。其說本于程敏政。攻秦冉。開元中追封彭衙伯。大中祥符閒。加封新息侯。顏何。開元中封開陽伯。大中祥符閒。加封堂邑侯。自唐迄明。從祀已久。所謂有其舉之。莫或敢廢。而乎敬廢之。過矣。家語。孔璇叔仲會年相比。俱執筆。迭侍孔子。孟武伯見孔子而問曰。此二孺子之幼也。于學豈能識于壯哉。孔子曰。然少成則天性也。習慣若自然也。惟因二子合傳。故不復別標璇名。今會既得祀。璇不應獨遺矣。此則祀典之闕也。

衛司寇惠叔蘭

按家語。子游嘗從孔子適衛。與將軍子蘭相善。使之受學于夫子。司寇惠子之喪。檀弓文也。鄭司農注云。惠子。衛將軍文子彌牟之弟。惠叔蘭也。古今議弟子從祀者。率本家語。而孔璇。惠叔蘭。獨遺之。不當補其闕乎。又荀卿法行篇。南郭惠子問于子貢曰。夫子之門何其雜也。子貢曰。君子正身以俟。欲來者不距。欲去者不止。且夫良醫之門多病人。驥楛之側多枉木。是以雜也。楊倞注云。夫子弟子。未詳其姓名。蓋居南郭。因以爲號。据此疑卽蘭也。

魯太史左邱子明。唐貞觀十三年。詔與顏淵同從祀廟庭。宋祥符中。贈瑕邱伯。政和中。改贈中都伯。葉夢得曰。古有左氏左邱氏。太史公稱左邱失明。厥有國語。今春秋傳作左氏。而國語出左邱氏。則不得爲一家。文體亦自不同。其非一家書明甚。

按左氏爲孔子弟子。主其說者衆矣。謂孔子將修春秋。與左邱明乘如周。觀書于周史。歸而修春秋之

經。邱明爲之傳者。嚴彭祖也。謂左邱明親見夫子。好惡與聖人同者。劉歆也。謂仲尼與邱明觀魯史記。有所褒貶。口授弟子。弟子退而異言。邱明恐弟子各安其意。以失其真。故論本事而作傳者。班固也。謂左氏傳理長。至明至切。至直至順。長于二傳者。賈逵也。謂春秋諸家去孔子遠。左氏傳出孔子壁中。近得其實者。王充也。謂邱明之傳。囊括古今。表理人事者。盧植也。謂邱明受經於仲尼。是爲素臣者。杜預也。謂孔子作春秋。邱明子夏造膝親受者。荀崧也。謂邱明之傳。釋孔氏之經。子應乎母。以膠投漆者。孔穎達也。謂邱明躬爲魯史。受經于仲尼者。劉知幾也。謂左氏受經于仲尼。博采諸家敘事。尤備。能令萬代之下。見其本末。比餘傳功最高者。啖助也。謂仲尼明周公之志。而修經。邱明受仲尼之經。而爲傳者。權德輿也。謂孔氏之門。左氏富而不誣。有以見聖賢之心者。劉軻也。謂邱明與聖人同時。接其聞見。參求其長。左氏爲上者。陳岳也。蓋自唐以前。諸儒之論。皆以邱明受業孔門。故貞觀永徽中。祀周公爲先聖。孔子爲先師。是時孔庭配食。止顏淵左邱明二人。褒崇之禮。若此。迨宋羣儒盡舍三傳說春秋。久而論世者。惑于趙匡之說。則疑左氏在孔子之前。惑于王安石之說。則疑左氏生孔子之後。衆口紛紛。迄無定論。遂使唐代特祀之先賢。并不得與七十子之列。然則漢晉以來。經生之說。均不足信。邪竊以爲議禮者之失矣。

又按司馬遷報任少卿書。左邱失明。厥有國語。應劭風俗通。邱姓魯。左邱明之後。然則左邱爲複姓。甚明。孔子作春秋。明爲作傳。春秋止獲麟。傳乃詳書孔子卒。孔子旣卒。周人以諱事神。名終將諱之。爲弟

子者自當諱師之名。此第稱左氏傳而不書左邱也。

魯林子放。唐贈清河伯。宋贈長山侯。

按家語弟子解。史記弟子傳。均無林放姓名。惟蜀禮殿圖有之。

牧子皮。

趙岐曰。牧皮。事孔子學者。

按孟子與琴張曾皙並稱。此必孔子之所與。似不宜置之祀典之外。

常子季。

按莊子德充符篇。常季問于仲尼曰。王骀兀者也。從之游者。與夫子中分魯。郭象注。常季。孔子弟子。

魯大夫子服子何景伯。

按漢魯峻石壁畫七十二子像。有子服景伯。唐劉懷玉作孔聖真宗錄。以子服景伯在七十子之間。

賓牟子賈。

廣韻注。漢複姓。魯有賓牟賈。

按樂記。賓牟賈侍坐于孔子。孔子與之言及樂。賓牟賈起。免席而請。斯弟子之職也。子曰。居吾語汝。論語之命季路。孝經之命子輿。皆然。孔子蓋以師道自居。則賈在弟子之列明矣。惟是孔子語弟子必呼其名。而記稱之曰吾子。豈記禮者去聖人之世稍後。遂有此失乎。


鞠子語

按晏子春秋景公上路寢。聞哭聲曰。吾若聞哭聲。何爲者也。梁邱據對曰。魯孔邱之徒。鞠語者也。明於禮樂。審於服喪。其母死。葬埋甚厚。服喪三年。哭泣甚哀。公曰。豈不可哉。而色悅之。孔叢子詰墨篇亦載其事。蓋曾參。閔損。高柴。仲由。孺悲。而外。又一孝子也。

齊大夫顏子涿聚。或作濁鄒。

按呂覽云。顏涿聚。梁父之大盜也。學于孔子。爲天下名士。以終其壽。而史記孔子世家。稱弟子三千。身通六藝者七十有二人。如顏濁鄒之徒。受業者甚衆。則雖不在七十子之列。然不可謂非孔氏之徒矣。古家語弟子解。七十六人。又與叔孫會合。傳有孔璇。又別見者。惠叔蘭。共七十八人。史記弟子傳。七十人。別見孔子世家者。有顏涿聚。共七十八人。蘇轍撰右史。著錄七十九人。家語有而史記無者。琴牢。薛邦。申續。陳亢。縣宣也。史記有而家語無者。公伯寮。鄭國。申棠。鄆單。秦冉。顏何也。益以文翁禮殿之廉瑀。林放。魯峻。石壁畫像之子服何。禮雜記之孺悲。射義之公罔之裘。序點。春秋左氏傳之仲孫何忌。仲孫閱。晏子之鞠語。孟子之牧皮。莊子之常季。通計九十八人。竊謂中有姓氏相近者。不當以臆見去留。先師之庭。宜概應從祀。他若論語之闕黨。互鄉二童子。魯峻。石壁畫象之□子慮。襄子孺。襄子魯。公子庶。顏子思。夫子高。韋續書品爲素王紀端。製麒麟書之。申姓名闕失。又蘧伯玉。孔子嚴事之友。施存。雖載陶宏景真誥。在三千人之數。不與弟子之列。不復著錄。恐滋後學之惑也。

又按孔門弟子籍，漢藝文志有孔子徒人圖法二卷，隋經籍志有鄭康成論語孔子弟子目錄一卷，唐藝文志作論語篇目弟子，惜俱失傳。議禮者止以國語爲憑。至斥史記爲附會。若文翁禮殿圖置之不復參詳矣。又會要通典、祖庭廣紀、素王紀事、孔門簽載、闕里志等編，紀諸弟子，連書姓名，統不分析，以致明南北雍闕里廟暨海內外府州縣衛學，從祀弟子，率改複姓爲一字姓，沿其誤而不知。今依廣韻注，如奚容、壤駟、左人、少叔、石作、左邱、悉爲更正。冀信古之君子有取焉。又按古今人表，于孔子弟子居第二等者，左邱明、顏淵、閔子騫、冉伯牛、仲弓，居第三等者，宰我、子貢、冉有、季路、子游、子夏、曾子、子張、曾皙、子賤、南容、公冶長、公西華、有若、漆雕、啓澹、臺滅明、樊遲、巫馬期、司馬牛、子羔、原憲、顏路、商瞿、季次、公良、顏刻、顏柳，居第四等者，孟懿子、南宮敬叔、公伯寮、公肩子、子石、琴牢、寶牟、賈，居第五等者，顏濁鄒、陳亢、林放、申枨、子服景伯。





孟子弟子考

朱彝尊撰

孟子弟子考

本館據學海類編

本排印初編各叢

書僅有此本

孟子弟子考

樂正子克、宋政和中贈利國侯。

趙岐曰：孟子弟子爲魯臣。

萬子章、宋贈博與伯。

趙岐曰：孟子弟子。

公孫子丑、宋贈壽光伯。

趙岐曰：孟子弟子。

浩生亦作告、子不害、宋贈東阿伯。

趙岐曰：齊人。

孟仲子、宋贈新蔡伯。

趙岐曰：孟仲子、孟子之從昆弟、從學于孟子者也。

陳子臻、宋贈蓬萊伯。

趙岐曰：孟子弟子。

充子虞、宋贈昌樂伯。

趙岐曰：孟子弟子。

屋廬子連、宋贈奉符伯。

趙岐曰：孟子弟子。

徐子辟、宋贈仙源伯。

趙岐曰：孟子弟子。

陳子代、宋贈沂水伯。

趙岐曰：孟子弟子。

彭子更、宋贈雷澤伯。

趙岐曰：孟子弟子。

公都子采、贈平陰伯。

趙岐曰：孟子弟子。

咸邱子蒙、宋贈須城伯。

趙岐曰：孟子弟子。

高子宋、贈泗水伯。

趙岐曰。高子。齊人。嘗學于孟子。

桃子應。宋贈膠水伯。

趙岐曰。孟子弟子。

盆成子括。宋贈萊陽伯。

孫奭曰。盆成括。嘗學于孟子。

滕子更。

趙岐曰。滕更。滕君之弟。來學于孟子。

吳萊曰。孟子學出于曾子子思。荀卿猶從而譏曰。世俗之溝愚瞶儒。嚙嚙然略法先王。案往舊造說而不知其統。我則異焉。治則法後王而已矣。所謂溝愚瞶儒。正指萬章公孫丑之徒也。荀卿在戰國。號稱大儒。猶同門異戶如此。

顧炎武曰。史記索隱。以萬章公明高等竝孟子之門人。廣韻注又云。離婁門人。不知其所本。元吳萊著孟子弟子列傳。惜乎今不傳也。

按趙岐注。孟子以季孫子叔二子爲孟子弟子。季孫知孟子意不欲。而心欲使孟子就之。故曰異哉弟子之所聞也。子叔心疑惑之。亦以爲可就之矣。孫宣公奭猶因其說。故政和五年。從太常議。贈季孫豐城伯。子叔乘陽伯。自朱子集注出。乃始非之。世莫有從趙氏之說者矣。吳立夫氏撰孟子弟子列傳。書

雖不傳序稱一十九人。則未嘗依朱子去季孫子叔二人。益以滕更。適合十九人之數。考盡心篇。公都子曰。滕更之在門也。趙岐注。滕更。滕君之弟。來學于孟子也。其爲弟子甚明。不知宋太常之議。何獨贈爵不及。有不可解者。至于史記索隱。以公明高爲孟子弟子。而廣韻注。謂離婁爲孟子門人。無稽之言。君子不信。又廣韻注。詮邱字。引孟子齊有曼邱不擇。今七篇無其文。弟子與其不謂之弟子與。吾不得而知之矣。

又按班氏古今人表。孟子居第二等。其弟子公孫丑居第三等。萬章、樂正子、告子、高子居第四等。徐子居第五等。餘不與焉。